

**Parlimen: Kerajaan Komited Jana Pertumbuhan Ekonomi Terancang  
Bernama  
16 Julai, 2012**

KUALA LUMPUR, 16 Julai (Bernama) -- Kerajaan komited menjana pertumbuhan ekonomi secara terancang serta meningkatkan pendapatan rakyat di negara ini, kata Menteri di Jabatan Perdana Menteri Tan Sri Dr Koh Tsu Koon.

Beliau berkata pelaksanaan Program Transformasi Ekonomi (ETP) sejak September 2010 bertujuan memacu ekonomi Malaysia ke arah negara berpendapatan tinggi bagi mencapai sasaran Pendapatan Kasar Negara (GNI) RM48,000 perkapita menjelang 2020.

Koh berkata demikian ketika menjawab soalan tambahan Senator Datuk Muhammad Olian Abdullah yang mendakwa ada pihak mengatakan pelaksanaan ETP akan mengakibatkan kos sara hidup meningkat serta meminta penjelasan tentang perancangan kerajaan agar golongan berpendapatan rendah tidak terabai.

"ETP dijangka akan membuka 3.3 juta peluang pekerjaan baru sehingga tahun 2020 yang akan meningkatkan pendapatan rakyat serta mengurangkan tekanan kenaikan kos sara hidup secara produktif dan efektif," katanya pada Persidangan Dewan Negara di sini Isnin.

Beliau berkata kerajaan melaksanakan beberapa inisiatif untuk menangani tekanan kos sara hidup antaranya Klinik 1Malaysia, Kedai Rakyat 1Malaysia, Bantuan Rakyat 1Malaysia dan Kad Diskaun Siswa 1Malaysia.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=680855>

